

*Prin complean tal segn des novitâts pal Centri di Documentazion pe scuele furlane*

## **Docuscuele al presente ai insegnants il gnûf sît e al batie un Festival dedicât ae letere pe infanzie in marilenghe**

E va indenant ad implen la ativitât di Docuscuele, il gnûf Centri di documentazion, ricercje e sperimentazion didattiche pe scuele furlane, che si invie ae conclusion dal prin an di ativitât.

Lunis ai 20 di Novembar, a Udin, inte sede de Filologjiche - a Palaç Mantica - che e da acet al archivi dai progjets e des esperiencis di valence didattiche, al sarà presentât il gnûf sît internet di Docuscuele. L'avigniment al è ricognossût tant che ativitât formative par insegnants.

Altris apontaments a son previodûts **joibe ai 23** a Lucinîs; **martars ai 28** a S. Denêl; joibe ai 30 a Cividât e infin **martars ai 5 di Dicembar** a S. Zorç di Noiâr.

Intai incuintris, ducj previodûts **pes 17** par vignî incuintri aes dibisugnis dai insegnants, si darà cont des potenzialitâts dal sît, ilustrant lis oportunitâts di acès ai materiâi e ai progjets za metûts in vore intes aulis dal Friûl, che a puedin diventâ un model pal insegnament plurilengâl inte scuele.

La ativitât di Docuscuele si môf ancje in direzion dal mont de ilustrazion e de editorie pe infanzie e par fruts in lenghe furlane. Simpri tacant di lunis ai 20 fin ai 30 di Novembar, di fat, si davuelzarà **“Fruts!”**, il **gnûf Festival de letere pe infanzie in lenghe furlane**. Dôs a son lis tipologjii di ativitât. La prime e je l'aprofondiment di un fra i libris ilustrâts plui significatîfs dal panorame internazionâl, **“Il pint dai fruts”**, scrit di Max Bolliger, autôr e pedagogjist svizâr, e ilustrât di Štěpàn Zavřel. A contâ la flabe a saran doi atôrs de compagnie Teatro Positivo. La propueste e je indreçade aes scuelis de infanzie e de primarie (su prenotazion, di lunis ai 20 a vinars ai 24 di Novembar, cun doi turnis ogni matine) e cuntun apontament dedicât aes fameis, sabide ai 25 di Novembar (simpri di matine, su prenotazion). I incuintris si fasin te sede di Docuscuele (li de Filologjiche a Udin, in vie Manin 18).

Sul teritori si davuelzaran invezit i **laboratoris creatîfs**, realizâts in colaborazion cu lis bibliotechis dal teritori furlanofon. Si podarà cognossi cussì la produzion grafiche e librerie di **cuatri fra i ilustradôrs furlans plui impuartants: Luigino Peressini**, il mâc des mapis, **Federica Pagnucco**, la regjine dai colôrs, **Barbara Jelenkovich**, la viazadore intal timp, e **Emanuele Bertossi**, il poete de nêf. Lôr si metaran in zûc cui fruts in orari scolastic, e cui insegnants - des 17 aes 19 - cun incuintris di pueste valits pal increditament formatîf daûr des liniis vuide MIUR 2016-2019.

Dutis lis ativitâts a son a jentrade libare. Par informazions e prenotazions, inviâ une email a [info@scuelefurlane.it](mailto:info@scuelefurlane.it) o clamâ il n. 0432.501598 (int. 5), di lunis a vinars, des 9:00 aes 13:00. [www.scuelefurlane.it](http://www.scuelefurlane.it)

*Udin, ai 17 di Novembar dal 2017*

### **INFORMAZIONS PE STAMPE - INFORMAZIONI PER LA STAMPA**

**Ufficio Stampa ARLeF** CALT relazioni pubbliche Tel. + 39 0432 229127 / **e-mail: arlef@caltpr.it**  
Adriano Del Fabro - mob. + 39 338 3245229 / Adriana Cruciatti - mob. +39 335 6853775

<<<<<<<<<<<<